

A fayece

“Don Ramon” baluarte cultural, compositor y canta autor

ORANJESTAD - Departamento di Cultura Aruba a ricibi noticia tristo cu otro gran baluarte di nos cultura Sr. Pedro Ramon Krosendijk, miho conoci como Don Ramon a bay laga nos.

Biografia

Don Ramon ta naci na Aruba riba dia 31 di januari 1950 y a bay laga nos riba dia 7 di januari 2015.

Na 1968 el a caba su MULO na La Salle College na Oranjestad. Despues a traha pa 10 aña na Directie Financiën. For di un edad hoben semper tabatin un pasion grandi pa musica. El a participa den coro na Santa Cruz. Don Ramon ta toca guitarra y a haya


les di canto cerca Sr. Rufo Odor. Como compositor e tabata un compositor completo cu por a crea letra y melodia.

Ora e compone cancionnan, nan semper ta cu letra, mensahe profundo y cu su guitarra e tabata saca e melodia.

Na 1978 Don Ramon a participa na e prome Festival di Papiamento. Hopi ta esnan di nos artistanan Arubiano cu el a yuda, sea den forma di compone cancion, poesia of a compaña.

El a participa na 1979 na e Tumba Festival cu un cancion componi door di Sr. Tino Ruiz, titula “Dun’e Tur Cos”.

Na 1979, Don Ramon a ricibi



un reconocimiento di “Aruba Academy Award” como miho cantante cu a tuma laga riba

diasabra 1 di december 1979 den Americana Hotel.

Ta bon pa menciona cu Don Ramon a gana e Festival OTI Antiyas Hulandes cu a tuma laga den Cas di Cultura cu su composicion “Mi Niño”, arreglo musical di Roberto Montiel y Coro di Maybeline Arends Croes. Cu e cancion “Mi Niño”, Don Ramon a representa Antiyas Hulandes riba dia 8 di december na aña 1979 den Teatro Academia Militar na Caracas.

Pa Festival di Voz i Landia e tabata compone cancionnan pa varios di e muchanan. Tabata na 1982 durante e prome festival Voz-i-Landia, caminda cu e composicion “Cunucu di Seit” a gana e prome laga.

Sr. Edwin Abath a participa na final di aña 1989 na e Festival di OTI, na Miami, cu un cancion “Mi Viejo”, co-compone pa Don Ramon. Sr. Abath a participa cu e cancion aki, caminda Aruba a participa pa prome biaha como pais.

Na ocasion di 40 aña di Radio Kelkboom na april 1994, Don Ramon a presenta su propio CD cu ta yama “Cunucu di Siet”, produci pa Watapana Recording Studio cu ocho cancion compone pa su persona.

Den añanan 90, Don Ramon a compone varios cancion pa Srta. Debby Werleman pa por a competi na e Festival Un Canto pa Aruba su Himno y Bandera.

Durante 1998 – 2001 Don Ramon tabatin un programa di radio di tur diasabra di 9’or pa 11’or di mainta cu yama “Tertulia Farandulero” via Radio Kelkboom.

Na 2003 den un produccion di DVD di “The Most Precious Gift” di Sr. Tino Ruiz, Don Ramon tabatin un calypso instrumental titula “My Lovely Black Lady”. Den e parti di splicacionnan di nos Ritmonan musical, manera wals, tumba, mazurka etc. den e DVD aki nos por aprecia e bos di Don Ramon den idioma Ingles y

Papiamento.

Don Ramon hunto cu Gos Oduber y mas miembro a crea e reglamento pa e Festival Un Canto Pa Aruba su Himno y Bandera pa muestra importancia riba e contenido di e cancion. E interpretacion, ki frase den melodia, e cantante su mensahe, cua ritmo di nos cancionnan manera dansa, tumba, wals, mazurka y polka por participa. Ki instrumento y no insulta y critica ningun hende, pero si por protesta. Reglamentonan cu te awe ta vigente den e Festival.

Tabata 2005 Edjean Semelcer ta acerca Don Ramon pa pidi permiso pa e por canta y graba e composicionnan di Ramon, e cancionnan “Recuerdo” y “Cunucu di Siet”. Y ta saca un produccion di CD. Edjean a experiencia Don Ramon como un persona di caracter calido y di pensamiento profundo. Despues den su proyecto “Hey ta Pasco” Edjean ta pidi Don Ramon un composicion di cual “Pasco di Amor” a ser componi.

Na maart 2007 e Festival “Un Canto pa Aruba su Himno y Bandera” a ser dedica na Don Ramon Krosendijk pa su aporte, composicion y gran apoyo.

Cu un anhelo pa un di su yunan sigui cu su pasion. El a conseha Gabriela su yiu mas chikito pa sigui cu canto. Na principio no tabata facil, pero despues cu Gabriela a participa den Sparkling Tour, por bisa cu un chispa a cuminsa brota.

Na 2010, Gabriela ta participa den Festival Un Canto pa Aruba su Himno y Bandera cu e composicion di su tata, Don Ramon titula “Un Elogio na nos Himno y Bandera”.

Na 2012 Don Ramon ta compone un cancion titula “Pakico” pa Gabriela. Cu esaki Gabriela ta participa den e Concierto Unoca den Plata di 25 aña di UNOCA.

Banda di tur esaki Don Ramon tabata un persona cu talento grafico y tabata un bon diseñado riba computer. □